

春秋傳註卷四

起昭公
盡哀公

蠡吾李熾著

昭公

元年春王正月公卽位

叔孫豹會晉趙武楚公子圍齊國弱宋向戌衛齊惡陳公子招蔡公孫歸生鄭罕虎許人曹人于虢

左傳尋宋之盟也虢鄭地

三月取鄆

乘莒亂也

夏秦伯之弟鍼出奔晉

左傳秦景公母弟鍼富埒于景懼選而奔則秦伯與鍼俱有過矣

六月丁巳邾子華卒

晉荀吳帥師敗狄于大鹵

左傳毀車爲卒自此始

秋莒去疾自齊入于莒莒展與出奔吳

左傳展與立而奪羣公子秩公子召去疾于齊齊納之展與以吳出奔吳前傳莒犁比公生去疾及展與似去疾長者然而展與已立爲世子又廢似展與嫡出者然則二人之後莒無優絀也展與與弒而立爲君踰年厯八九月而奔不稱爵者杜註曰據傳篡弒者與會諸侯則稱爵此未會故不稱也按會而稱爵者鐵壺所謂已成君不能沒非實也

叔弓帥師疆鄆田

葬邾悼公

冬十有一月巳酉楚子麇卒楚公子比出奔晉

左傳楚子有疾楚子康王之子公子圍其親叔父也入問疾縊而弑之自立以疾終赴於諸侯公子比亦其親叔父也經隨書出奔則楚子之卒有故可見矣

二年春晉侯使韓起來聘

杜註公即位也

夏叔弓如晉

左傳報韓起也

秋鄭殺其大夫公孫黑

公孫黑將爲亂子產數其應死之罪乃縊

冬公如晉至河乃復季孫宿如晉

左傳晉少姜卒公如晉及河晉使士文伯來辭曰非伉儷也請君無辱乃還
鐵壺氏曰襄公末年如楚歸以季氏取卞幾不敢入子野之卒又闇昧不明
未必非懼公之洩于晉而阻之已乃自往結好也

三年春王正月丁未滕子原卒

夏叔弓如滕五月葬滕成公

秋小邾子來朝

八月大雩

冬大雨雹

北燕伯款出奔齊

左傳燕簡公多嬖寵欲盡去諸大夫而立其寵人冬諸大夫比以殺公之外
寵公懼奔齊

四年春王正月大雨雹

夏楚子蔡侯陳侯鄭伯許男徐子滕子頓子胡子沈子小邾子宋世子佐淮夷會于申楚人執徐子

毛氏傳曰楚子于弑立後假合諸侯以自固故爲申之會左傳稱使如晉求諸侯而晉許之又時鄭伯許男原如楚遂強留之以待會然齊晉魯衛曹邾燕秦諸國並無一與但其舊屬及夷蠻小國而已楚靈雖侈而實絀矣左傳徐子吳所出楚疑其貳故執之鐵壺氏曰春秋之初天王猶小有征伐至子突救衛以後則無聞焉自隱至僖凡會盟戰伐之大者皆諸侯主之是天子之微而諸侯之恣也自僖之末以至文宣則諸侯之怠而大夫之張也自宣之末以至襄昭則大夫之恣而諸侯之微也自昭以至定哀則列國之衰而吳楚之橫也隱桓莊之世諸侯之特相盟交相伐者籍籍焉桓文既霸則咸

自戢矣及定哀而特相盟交相伐者不異於春秋之初則霸統之既絕也齊桓既沒以及靈成景厲之間晉霸中衰則間之而私會盟私侵伐蓋紀散則衆亂也及其季也會于申而天下之諸侯搖于楚矣滅陳滅蔡伐吳誅齊慶封而天下之征伐侈于楚矣又其季也入郢敗齊伐魯伐陳遷蔡藩衛侯會于黃池而天下之會盟征伐侈于吳矣鄉非楚敗而吳暴亡吾不識其勢之所終極也夫以天下諸侯之衆而不能支吳楚者非力弱也其紀散則勢衰耳定之四年會于召陵者十八國雖桓文所資以屈楚不若是之衆也方是時晉有六卿齊有陳氏魯有三桓宋衛陳鄭皆有强家各固其私不力公事故未見楚鋒而已渙然自離喪矣一國之紀散則無以率臣民霸者之紀散則無以屬諸侯非一朝一夕之故矣按會序徐子于滕頓諸國之上而稱爵終乃執之者蓋楚靈震嚇諸侯以爲吾所執者非細弱也

秋七月楚子蔡侯陳侯許男頓子胡子沈子淮夷伐吳執齊慶封殺之遂滅賴
毛氏傳曰楚效晉撓伐而以與會之鄭宋又去而不從故雖因申會而不書
諸侯之師也左傳楚圍吳朱方克之執齊慶封而盡滅其族賴小國名

九月取鄆

左傳莒亂去疾立而不撫鄆鄆叛而來故曰取

冬十有二月乙卯叔孫豹卒

五月春王正月舍中軍

左傳曰卑公室也襄十一年增舊二軍爲三軍今以霸主賦重又舍去中軍
之衆分屬上下二軍仍稱二軍其賦稅又變前之三分公室者而四分之季
氏擇二子名一皆盡征之而貢於公則魯公尺土一民莫之有矣故曰卑
公室鐵壺氏曰傳載清之役季氏爲左師孟叔爲右師當是季氏爲一軍孟

叔共一軍也

楚殺其大夫屈申

左傳以爲貳于吳也

公如晉

夏莒牟夷以牟婁及防茲來奔

左傳牟夷非卿而書重地也莒人愬于晉晉侯將止公范獻子曰人朝而執之而不可請歸之而以師討焉胡傳曰春秋于三叛人雖賤特書其名懲不義也邑而書及者穀梁曰以大及小也

秋七月公至自晉

戊辰叔弓帥師敗莒師于蚡泉

左傳莒人來討敗之杜註蚡泉魯地

秦伯卒

冬楚子蔡侯陳侯許男頓子沈子徐人越人伐吳

越始見經楚通之也猶晉之通吳以憶楚也越稱人大夫常壽過也

六年春王正月杞伯益姑卒

葬秦景公

夏季孫宿如晉

毛氏傳曰晉將爲莒討魯而不果討因謝之

葬杞文公

宋華合比出奔衛

左傳宋公逐之

秋九月大雩

楚薳罷帥師伐吳

冬叔弓如楚

左傳聘且弔爲吳所敗也

齊侯伐北燕

左傳謀納簡公也

七年春王正月暨齊平

毛氏傳曰及至燕而不能納燕乃求成盟于濡上經不書燕與齊平蒙上伐燕文也然不書齊與燕平而反曰與齊平以求盟自燕也

三月公如楚

左傳楚成章華之臺願與諸侯落之召魯魯往

叔孫舍如齊蒞盟

正義曰魯與齊隣公遠適楚慮其或來侵我遣使與之盟

夏四月甲辰朔日有食之

秋八月戊辰衛侯惡卒

九月公至自楚

冬十有一月癸未季孫宿卒

十有二月癸亥葬衛襄公

八年春陳侯之弟招殺陳世子偃師

左傳陳哀公元妃生太子偃師次妃生公子留下妃生公子勝留有寵哀公屬諸司徒招及公子過公有廢疾招過殺偃師而立留哀公憂悲自縊鐵壺氏曰所殺世子也故不與兩下相殺等然不書弑者陳侯未卒世子又不等於君也

夏四月辛丑陳侯溺卒

叔弓如晉

左傳賀廐祁宮成也史趙曰甚哉其相蒙也可弔也而又賀之

楚人執陳行人于徵師殺之陳公子留出奔鄭

左傳陳于徵師討哀公喪于楚且告有立君公子勝愬之于楚楚人執而殺之公子留出奔鐵壺氏曰其不曰陳留何也奔而以名係國與鄭忽曹羈相混疑于世子偃歸既死羣公子爭立而留爲世子之母弟矣惟稱公子然後知其爲招所欲立以代世子者而懼楚以奔也

秋蒐于紅

杜註紅魯地左傳自根牟至于商衛革車千乘李于鱗曰此三家既分公室假軍禮以數軍實也

陳人殺其大夫公子過

左傳公子招歸罪于過而殺之

大雩

冬十月壬午楚師滅陳執陳公子招放之于越殺陳孔奐

招謝罪于過故得放而又殺其黨孔奐

葬陳哀公

左傳輿嬖袁克殺馬毀玉以葬

九年春叔弓會楚子于陳

杜註時楚靈滅陳爲縣在陳故往會之非行會禮也

許遷于夷

左傳邑卽城父

夏四月陳災

毛氏傳曰陳既爲縣無稱縣以記災之例莊二十年齊大災襄十九年宋災二十年宋又災昭十八年宋衛陳鄭災凡記外災皆以國未嘗以都邑也卽本國記災皆關宮社如御廩新宮雉門毫社之類並無及都邑者况災必有告此時陳既不告而楚必無以縣災而來告者乃特書陳災分明以國與陳矣雖陳後幸復而此時已滅夫子于書滅陳之後連書葬陳哀公會楚子于陳及陳災蓋惡强楚傷衰霸閔神明之裔書一陳字而歎息之聲具焉若不告而書者以叔弓歸知之也

秋仲孫纘如齊

左傳孟僖子如齊殷聘杜註曰自叔老聘齊至今二十年禮意久曠故修盛聘以將之

冬築郎囿

卽地築苑也

十年春王正月

夏齊欒施來奔

毛氏傳曰欒施字子旗高彊字子良同爲惠族皆嗜酒信內多怨強於陳鮑氏而惡之或告子旗與子良將攻陳鮑氏而陳鮑氏先之子良欲劫公而使之助已反攻公虎門公徒出戰敗之欒高皆來奔彊不書非卿也按齊有欒氏高氏以齊惠公子有子欒予高而欒施與高彊皆就祖字而分之爲氏故子旗之父子雅子良之父子尾皆惠族有名子雅之卒晏嬰歎曰姜族弱矣而嬀將始昌二惠兢爽猶可又弱一个焉姜其危哉公羊但知晉有欒氏而不知齊亦有之改經齊字爲晉字何也况此一奔正齊陳興廢一大關也是

時陳鮑分二氏之室陳桓子用晏子言盡致諸公而請老子莒且公族衰桓子乃召高氏所逐子山子商子周欒氏所逐子城子公公孫捷皆反其邑益其祿厚給其衣履幃幄器用凡公子孫之無祿者私與邑之國之貧約孤寡者私與之粟而民心歸之陳氏至是益大矣

秋七月季孫意如叔弓仲孫矍帥師伐莒

左傳季氏伐莒取郟而用俘以祭亳社臧武仲在齊聞之曰周公其不饗魯祭乎按叔弓間于季孟之間而伐莒蓋以會葬晉平不敢使散卿往故叔孫舍如晉而弓代將也

戊子晉侯彪卒

九月叔孫舍如晉葬晉平公

十有二月甲子宋公成卒